

Član 4.

Odluka stupa na snagu narednog dana od dana objavljivanja u "Službenim novinama Kantona Sarajevo".

Broj 01-02-373/06
21. februara 2006. godine
Sarajevo

Predsjedavajući
Gradskog vijeća
Marin Ivanišević, s. r.

Na osnovu člana 24. stav 1. tačka 2. Statuta Grada Sarajeva ("Službene novine Kantona Sarajevo", broj 12/98, 14/98 i 25/05), te člana 4. stav 3. Odluke o uslovima i postupku prihvatanja pokroviteljstva Grada Sarajeva ("Službene novine Kantona Sarajevo", broj 5/06), Gradsko vijeće Grada Sarajeva, na svojoj sjednici održanoj 21. februara 2006. godine, donosi

ODLUKU

O PRIHVATANJU POKROVITELJSTVA GRADA
SARAJEVA ZA ODRŽAVANJE PREMIJERE FILMA
"GRBAVICA" JASMILE ŽBANIĆ

Član 1.

Ovom Odlukom prihvata se Pokroviteljstvo za održavanje premijere filma "Grbavica" Jasmine Žbanić, koja će se održati u

povodu Prvog marta, Dana nezavisnosti Bosne i Hercegovine, u iznosu od 80.000,00KM.

Član 2.

Sredstva iz člana 1. ove Odluke izdvojit će se iz Budžeta Grada Sarajeva za 2006. godinu.

Član 3.

Za realizaciju ove Odluke zadužuju se predsjedavajući Gradskog vijeća i gradonačelnica.

Član 4.

Odluka stupa na snagu danom donošenja, a objavit će se u "Službenim novinama Kantona Sarajevo".

Broj 01-02-366/06
21. februara 2006. godine
Sarajevo

Predsjedavajući
Gradskog vijeća
Marin Ivanišević, s. r.

OPĆINA CENTAR

Općinsko vijeće

Na osnovu člana 78. Zakona o prostornom uređenju ("Službene novine Kantona Sarajevo", broj 7/05), člana 29. Zakona o lokalnoj samoupravi - Prečišćeni tekst ("Službene novine Kantona Sarajevo", broj 22/00) i članova 10. i 68. Statuta Općine Centar Sarajevo - Prečišćeni tekst ("Službene novine Kantona Sarajevo", broj 23/04), Općinsko vijeće Centar Sarajevo je, na Trinaestoj redovnoj sjednici održanoj dana 30. januara 2006. godine, donijelo

ODLUKU

O SJEČI I POTKRESAVANJU STABALA

Član 1.

Ovom Odlukom se reguliše postupak sječe i potkresavanja stabala na javnim površinama, na području Općine Centar Sarajevo, a na zemljištu u privatnom vlasništvu izuzetno, ako stablo ugrožava život i zdravlje ljudi, instalacije komunalne infrastrukture, te stabilnost okolnih objekata.

Član 2.

Sječa i potkresavanje stabala vrši se na osnovu odobrenja koje donosi općinski načelnik putem Službe za upravu za prostorno uređenje i komunalne poslove.

Član 3.

Općinski načelnik rješenjem imenuje komisiju koja daje stručni nalaz u svakom pojedinačnom slučaju.

Komisija broji tri člana, a u sastav komisije se imenuje diplomirani inženjer arhitekture, poljoprivrede i šumarstva.

Član komisije iz oblasti šumarstva je predstavnik KJKP "Park".

Član 4.

Sječa stabla odobriće se:

- ako je stablo prestalo sa vegetacijom,
 - ako postoji opasnost od pada stabla,
 - ako stablo ugrožava život i zdravlje ljudi, instalacije komunalne infrastrukture, te stabilnost okolnih objekata,
 - ako se stablo nalazi na lokaciji za koju je izdato odobrenje za građenje,
 - ako ugrožava bezbjednost i preglednost saobraćaja.
- Potkresavanje stabla odobriće se:

- ako stablo svojim rastom utiče na uslove života i rada ljudi u okolnim objektima,
- ako je djelimično prestalo sa vegetacijom,
- ako oštećuje okolne objekte i instalacije komunalne infrastrukture.

Ukoliko se radi o stablu koje zbog svog položaja (stabla u obuhvatu zaštićenih površina), vrste stabla ili iz drugih razloga, predstavlja hortikulturnu i biološku vrijednost, odobrenje za sječu ili potkresavanje donosi se po prethodno pribavljenom mišljenju Kantonalnog zavoda za zaštitu kulturo-historijskog i prirodnog naslijeđa ili Komisije za ekologiju i zaštitu kulturnog i prirodnog naslijeđa Općine Centar Sarajevo.

Član 5.

Održavanje stabala u obavezi je:

- vlasnika ili korisnika zemljišta na kojem se stablo nalazi,
- upravitelja zgrade ukoliko se radi o stablu koje se nalazi u okućnici objekta kolektivnog stanovanja,
- komunalnog preduzeća na površinama utvrđenim Odlukom o održavanju zelenih i rekreacionih površina ("Službene novine Grada Sarajeva", broj 6/87).

Član 6.

Zahtjev za sječu ili potkresavanje stabla može podnijeti vlasnik ili korisnik zemljišta na kojem se stablo nalazi, investitor novog objekta, upravitelj zgrade i zainteresovano lice.

Postupak za sječu ili potkresavanje stabla može pokrenuti i općinski organ uprave nadležan za komunalne poslove po službenoj dužnosti.

Član 7.

Uz zahtjev za izdavanje odobrenja za sječu ili potkresavanje stabla dostavlja se kopija katastarskog plana sa označenim mjestom gdje se stablo nalazi, a ukoliko se radi o sječi ili potkresavanju stabla radi izgradnje novog objekta onda i odobrenje za građenje.

Član 8.

Troškove sječe ili potkresavanja stabla snosi vlasnik ili korisnik zemljišta na kojem se stablo nalazi, investitor novog objekta, upravitelj zgrade, odnosno komunalno preduzeće u čijoj je nadležnosti održavanje stabla.

Član 9.

Na zahtjev zainteresovanog lica ili po službenoj dužnosti, općinski organ uprave nadležan za komunalne poslove može rješenjem naložiti vlasniku ili korisniku zemljišta, da o vlastitom

trošku izvrši sječu ili potkresavanje stabla ukoliko su ispunjeni uslovi iz člana 4. ove Odluke.

Ukoliko vlasnik ili korisnik zemljišta ne postupi po rješenju iz prethodnog stava ovog člana, sječu ili potkresavanje stabla izvršiće o trošku izvršenika općinski organ uprave nadležan za komunalne poslove putem nadležnog komunalnog preduzeća.

Član 10.

Sječa ili potkresavanje stabala vrši se putem fizičkih ili pravnih lica specijalizovanih za tu vrstu posla.

Sve štete koje nastanu pri sječi ili potkresavanju usljed nepažnje ili nepoduzimanja neophodnih mjera sigurnosti snosi lice iz stava 1.

Član 11.

Ukoliko je zbog izgradnje novog objekta ili postavljanja instalacija neophodno uklanjanje stabla, investitor objekta, odnosno instalacija je dužan da o svom trošku izvrši premještanje ili sadnju novog stabla uz saglasnost Službe za upravu za prostorno uređenje i komunalne poslove, na mjestu koje odredi nadležno komunalno preduzeće.

Član 12.

Inspeksijski nadzor nad provođenjem odredaba ove Odluke vrši nadležna komunalna inspekcija.

Član 13.

Ako je do stupanja na snagu ove Odluke upravni postupak pokrenut kod nadležnog organa, a nije doneseno prvostepeno rješenje ili je rješenje poništeno i vraćeno prvostepenom organu na ponovni postupak, postupak će se nastaviti po odredbama ove Odluke.

Član 14.

Stupanjem na snagu ove Odluke prestaje da važi Odluka o zaštiti stabala i niskog rastinja ("Službene novine Grada Sarajeva", broj 7/83, 22/89 i 14/90).

Član 15.

Ova Odluka stupa na snagu narednog dana od dana objavljivanja na oglasnoj ploči Općine Centar Sarajevo, a naknadno će se objaviti u "Službenim novinama Kantona Sarajevo".

Broj 01-23-1110/06
30. januara 2006. godine
Sarajevo

Predsjedavajući
Općinskog vijeća
Muhamed Alaim, s. r.

(Ova Odluka je objavljena na oglasnoj ploči Općine Centar Sarajevo 7. 3. 2006. godine.)

Na osnovu člana 29. Zakona o lokalnoj samoupravi - Prečišćeni tekst ("Službene novine Kantona Sarajevo", broj 22/00), člana 2. Zakona o javnim priznanjima Kantona Sarajevo ("Službene novine Kantona Sarajevo", broj 19/97 i 13/99), člana 2. Odluke o općinskim priznanjima ("Službene novine Kantona Sarajevo", broj 24/05), član 10. Statuta Općine Centar Sarajevo-Prečišćeni tekst ("Službene novine Kantona Sarajevo", broj 23/04), te člana 27. Poslovnika Općinskog vijeća Centar Sarajevo - Prečišćeni tekst, ("Službene novine Kantona Sarajevo", broj 23/04), Općinsko vijeće Centar Sarajevo je, na Četrnaestoj redovnoj sjednici Općinskog vijeća održanoj 28. februara 2006. godine donijelo

ODLUKU

O DODJELI OPĆINSKOG PRIZNANJA "POVELJA SA GRBOM OPĆINE CENTAR " KARIŠIK MEHI-KEMI

Član 1.

Općinsko priznanje "POVELJA SA GRBOM OPĆINE CENTAR" dodjeljuje se Karišik Mehi-Kemi.

Član 2.

Dodjela općinskog priznanja iz člana 1. ove Odluke izvršit će se na svečanoj sjednici Općinskog vijeća Centar Sarajevo, povodom obilježavanja Dana Općine.

Član 3.

Ova Odluka stupa na snagu danom objavljivanja na oglasnoj ploči Općine Centar Sarajevo, a naknadno će se objaviti u "Službenim novinama Kantona Sarajevo".

Broj 01-49-459/06
28. februara 2006. godine
Sarajevo

Predsjedavajući
Općinskog vijeća
Muhamed Alaim, s. r.

(Ova Odluka je objavljena na oglasnoj ploči Općine Centar Sarajevo 7. 3. 2006. godine.)

Na osnovu člana 78. Zakona o prostornom uređenju ("Službene novine Kantona Sarajevo", broj 7/05), člana 29. Zakona o lokalnoj samoupravi - Prečišćeni tekst ("Službene novine Kantona Sarajevo", broj 22/00) i člana 10. i 68. Statuta Općine Centar Sarajevo - Prečišćeni tekst ("Službene novine Kantona Sarajevo", broj 23/04), Općinsko vijeće Centar Sarajevo je, na Četrnaestoj redovnoj sjednici održanoj dana 28. februara 2006. godine, donijelo

ODLUKU

O POSTAVLJANJU FIRMI I REKLAMA NA GRADEVINAMA I FASADAMA I UREĐENJU FASADA NA PODRUČJU OPĆINE CENTAR SARAJEVO

Član 1.

Ovom Odlukom regulišu se uvjeti za postavljanje firmi, reklama, fasadnih reklamnih panoa displeja, reklamnih vitrina, plakata, transparentata, oglasa, zastava, postavljanje fasadnih tendi, satelitskih antena i klima uređaja na građevinama i fasadama te uređenje fasada izradom murala, na području Općine Centar Sarajevo.

Član 2.

U smislu ove Odluke firmom se smatra ime pod kojim poduzeće posluje, organa uprave i drugih državnih organa i organizacija, udruženja građana, sportskih i kulturnih društava, humanitarnih organizacija, samostalnih radnji građana, ugostiteljskih, zanatskih i sličnih, advokatskih kancelarija, pod uvjetom da su istaknuti na radnim prostorijama na kojima se po Zakonu moraju istaći.

Reklamom se smatraju nazivi i njihove skraćene oznake koje se po članu 2. ne smatraju firmom, kao i svaki drugi natpis na javnom mjestu kojim vlasnik ukazuje na svoje proizvode ili usluge.

Pravna i fizička lica mogu u reklamama istaći svoje proizvode i usluge čije isticanje nije Zakonom zabranjeno.

Za postavljanje firmi, reklama, reklamnih vitrina, fasadnih reklamnih panoa, displeja, satelitskih antena i klima uređaja potrebno je odobrenje koje donosi općinski načelnik putem Službe za upravu za prostorno uređenje i komunalne poslove (u daljnjem tekstu: nadležna Služba).

Član 3.

Po zahtjevu pravnog ili fizičkog lica nadležna Služba razmatra urbanističko - tehničke uvjete i o tome donosi rješenje.

Za postavljanje reklama, fasadnih reklamnih panoa, displeja, reklamnih vitrina, zastava, satelitskih antena i klima uređaja rješenje se donosi po prethodno pribavljenom mišljenju Zavoda za planiranje razvoja Kantona Sarajevo ukoliko nije urađen elaborat.

Ukoliko se postavljanje reklama, fasadnih reklamnih panoa, displeja, reklamnih vitrina, zastava, satelitskih antena i klima uređaja razmatra na objektima graditeljskog nasljedja ili objektima u obuhvatu centralnog gradskog jezgra rješenje se donosi i na osnovu pozitivne saglasnosti Zavoda za zaštitu kulturno - historijskog i prirodnog nasljedja Kantona Sarajevo.

Saglasnost Ministarstva prometa i komunikacija obavezna je u slučaju konzolnih elemenata koji mogu ugroziti pješački i kolski saobraćaj.

Navedene saglasnosti pribavlja nadležna Služba po službenoj dužnosti.